



JUDISIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

20 Setembru 2012

JSMP halao audiénsia ho Komisaun A Parlamentu Nasionál Lejizlatura Datoluk

Ekipa JSMP ne'ebé konstitui hosi Diretór Ezekutivu, Koordenadór Unidade sira, inklui membru pesoál sira hosi sub-unidade Projetu Observasaun Parlamentu (POP) iha Kinta feira, 20 Setembru 2012 halo audiénsia ho Komisaun A Parlamentu Nasionál Lejizlatura Datoluk.

Audiénsia ho Komisaun A ne'e ho objetivu atu introdús JSMP nia servisu iha área justisa nian iha jerál, nune'e mós iha partikulár hato'o observasaun ne'ebé JSMP halo durante tinan rua ba Komisaun A iha Lejizlatura Daruak nian inklui mos rekomendasaun balun Komisaun A Parlamentu Nasionál Lejizlatura Datoluk nian atu konsidera durante sira nia períodu servisu. Rekomendasaun sira ne'e bázeia ba observasaun JSMP nian ba obstákulu ne'ebé Komisaun ne'e hasoru no fallansu sira ne'ebé halo durante lejizlatura liu ba.

Audiénsia ne'e importante tebes no nu'udar kontaktu inisiál ida ne'ebé determinante tebes ba kontaktu no kolaborasaun servisu entre JSMP no Parlamentu Nasionál, liu-liu Komisaun A iha futuru iha asuntu justisa no lejislativu nian, dehan Diretór Ezekutivu JSMP, Luis de Oliveira Sampaio.

Rekomendasaun prinsipál ne'ebé JSMP foka liu iha audiénsia ne'e mak kona-ba kestaun sira ligadu ho esbosu ka projetu Lei Insititu Memória Públiku, Lei Programa Reparasaun Nasionál, Lei ba Rai, alterasaun Lei Pensaun Vitalisia no Lei Anti Korupsaun, ne'ebé Lejizlatura Daruak husik hela. Iha parte seluk, JSMP mós hato'o preokupasaun sira comunidade nian liga ho papél órgaun soberanu sira nian. Iha setór justisa nian, JSMP hato'o kona-ba implementasaun Lei Protesaun ba Testemuña, progresu no dezafiu kona-ba implementasaun Lei Kontra Violénsia Doméstika no kazu inestu iha Timor-Leste.

Prezidente Komisaun A, Dra. Carmelita Moniz no nia membru sira ne'ebé partisipa iha audiénsia ne'e simu ho laran ksolok ekipa JSMP nian, liu-liu kona-ba JSMP nia servisu, hanoin no rekomendasaun sira. Kestaun sira ne'ebé deputadu sira foti iha parte diskusaun mak kona-ba violénsia doméstika, servisu tribunál nian no kazu inestu iha Timor-Leste.

Haree ba servisu JSMP nian ne'ebé deputadu sira konsidera importante tebes prosesu dezvoltamentu no konsolidasaun sistema judisiáriu Timor-Leste nian, deputadu sira maiória sujere atu JSMP simu fundu hosi Orsamentu Estadu ne'ebé aloka ba Sosiedade Sivil. Ho rekursu finanseiru no umanu ne'ebé suficiente bele fasilita di'ak liu tan servisu JSMP nian iha futuru.

Prezidente Komisaun A agradese ekipa JSMP no konsidera katak enkontru ne'e importante tebes. Prezidente ne'e husu atu JSMP bele kolabora di'ak liu tan ho Sociedade Sivíl relevante sira seluk, partikularmente ho Komisaun A PN atu bele servisu hamutuk hodi tau matan ba asuntu Justisa no halo sosializasaun kona-ba knaar parlamentu nian iha futuru hodi bele servi povu no rai ida ne'e ho di'ak.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883/77810637